

Morning Regional Dogri News Bulletin, 23rd March 2024

मार्निग डोगरी न्यूज़ बुलेटिन, समें. 09-20 Hrs

<><><><><><>

Headlines

1. प्रधानमंत्री नरेन्द्र मोदी होरें आक्खेआ ऐ जे भारत भूटान दिएं विकास तांहगें गी पूरा करने लेई ओह्दे कन्नै खड़ोते दा ऐ।
2. उधमपुर लोकसभा हल्के च चुनां प्रचार जोरें-शोरें कन्नै जारी ऐ जित्थें लोकसभा चुनाएं दे पैहले गेड़ तैहत 19 अप्रैल गी वोट पोआए जांगन।
3. जम्मू कश्मीर दे मुख सचिव अटल डुल्लू होरें खुराक, सार्वजनिक बंड बिक्री ते उपभोक्ता मामले, प्रशासनिक सुधारें ते सिखलाइयै सरबंधी मैहकमें दी कारकरदगी दा जायजा लैता।
4. केन्द्री माध्यमिक शिक्षा बोर्ड सीबीएसई आस्सेआ मानता रद्द कीते गेदे 20एं स्कूलें च जम्मू कश्मीर दे कटुआ जिले दा बी इक स्कूल शामिल।

<><><><><><>

PM-Bhutan

भारत भूटान गी अगले 5एं ब'रें च 10 जहार करोड़ रपे दी माली मदाद करोग। प्रधानमंत्री नरेन्द्र मोदी होरें एह्दी घोषणा अपने भूटान दौरें दे पैहले दिन थिंपु च कल दित्ती। भारत नै भूटान बश्कार राष्ट्रीय हितें कन्नै जुड़े दे मुद्दें गी लेइयै सैहयोग करने बारे आपसी सैहमति बनी गई ऐ। प्रधानमंत्री मोदी होरें भूटान दौरें बारे इक संयुक्त ब्यान च आक्खेआ गेआ ऐ जे पन बिजली, सौर ते ग्रीन हाईड्रोजन दे क्षेत्रें च साफ ऊर्जा दे विस्तार आस्तै भारत ते भूटान किट्ठे रलियै कम्म करगंन। दौनें देशें रेल, शिड़क, हवाई ते जल यातायात, उद्योग आधारभूत ढांचे दे कन्नो कन्नी डिजिटल संपर्क गी होर मजबूत करने पर बी सैहमति जताई। दौनें देशें बश्कार भ्याली बुनियाद सांझे मूल्य, संस्कृति ते आध्यात्मिक धरोहर पर आधारत ऐ। दौनें देसं रेलवे सरबंधी राबता कायम करने लेई सैहमति पत्र पर दस्तखत बी कीते। एह्दे अलावा दौनें देसें राष्ट्रीय हित सरबंधी मुद्दें पर रलियै ते समर्थन कन्नै कम्म करने लेई हामी भरी ऐ।

<><><><><><>

Campaign(byte)

ओंदे लोकसभा चुनाएं दे पैहले गेड़ तैहत जम्मू कश्मीर दे उधमपुर लोकसभा हल्के च 19 अप्रैल गी वोट पोआए जांगन जेहदे लेई चुनां प्रचार जोरें शोरें कन्नै जारी ऐ। सब्बै पार्टियां मतदाताएं गी अपने हक्कै च करने लेई अपनी पूरी टिल्ल ला करदियां न। इस सीट लेई बीजेपी दे मेदवार केन्द्री मंत्री डॉ. जितेन्द्र सिंह होरें कल उधमपुर जिले दी चनैनी तैहसील नरसू ब्लाक च इक नुक्कड़ सभा गी संबोधत कीता.....बाईट

तोआई हाल च कांग्रेस पार्टी च शामिल होए दे साबका मंत्री चौधरी लाल सिंह होरें कल कटुआ ते हीरानगर दा दौरा लाया। उनें सरकार पर डोगरे दी अनदिक्खी करने दा आरोप लाया ते आक्खेआ जे इत्थूं दे मूल निवासिएं दियां जिमियां खुस्सियां जा'रदियां न ते मकामी लोकें लेई कम्म रोजगार दे मौके बी नेई न। उनें आक्खेआ जे बाहरा आइयै इत्थें उद्योग कारखाने लाने आले गी 100 फीसद रियायत देने दा सरकार पर फैसला मकामी लोकें कन्नै बेन्यायी ऐ।

<><><><><><>

Udhampur Lok Sabha

19 अप्रैल गी होने आले लोकसभा चुनाएं लेई कल उधमपुर हल्के थमां त्रै होर मेदवारें अपने नामांकन पत्र दाखले कीते। एहदे कन्नै गै हून उधमपुर हल्के थमां नामांकन पत्र दाखल करने आले मेदवारें दी कुल गिनतरी 5 होई गई ऐ। उआं नामजदगियां भरने दी खीरी तरीक 27 मार्च 2024 गी 3 बजे तगर ऐ।

<><><><><><>

Randomization

ओंदे संसदीय चुनाएं गी दिक्खदे होई कल जम्मू जिले दे 11एं असेंबली हल्के ते सांबा जिले दे त्रौं असेंबली हल्के लेई इलैक्ट्रानिक वोटिंग मशीनें दी पैहली रैंडमाइजेशन कीती गई। रैंडमाइजेशन ओ प्रक्रिया होंदी ऐ जेहदे सब्बने सियासी पार्टिएं दे प्रतिनिधिएं ते चुनां अफसरें ते होर दुए अमले दी मजूदगी च कम्प्यूट्रिकृत ऐप्स दी मदद कन्नै एह फैसला लैता जंदा ऐ जे केहड़ी वोटिंग मशीन ते वीवीपैट मशीनें गी केहड़े केहड़े पोलिंग बूथ जां पोलिंग स्टेशन पर भेजेआ जाग। जम्मू च जिला चुनां अफसर सचिन कुमार वैश्य जिसलै जे सांबा जिले च जिला चुनां अफसर अभिषेक शर्मा हुंदी दिक्ख-रिक्ख च रैंडमाइजेशन दी प्रक्रिया गी तोड़ चाढ़ेआ गेआ।

<><><><><><>

DPAP

भारतीय चुनाव आयोग नै आँदे लोकसभा चुनाव लेई गुलाब नबी आजाद हुंदी पार्टी डैमोक्रेटिक प्रोग्रेसिव आजाद पार्टी गी बाल्टी चुनाव चिन्ह दित्ता गेआ ऐ। लोकसभा चुनाव अगले म्हीने थमां शुरू होआ'रदे न जिंदे च 7 चरणें च मतदान होग। पैहले चरण तैहत मतदान 19 अप्रैल थमां शुरू होआ'रदा ऐ।

<><><><><><>

Bihar Diwas

कल जम्मू कश्मीर राजभवन च बिहार दिवस मनाया गेआ। इस मौके पर वरिष्ठ अधिकारिण सनें विद्यार्थी ते जम्मू कश्मीर प्रदेश च बिहार दे रौहने आले बसनीके दी खास साददा दित्ता गेदा हा। परौहने गी संबोधत करदे होई उपराज्यपाल मनोज सिन्हा होरें बिहार दे लोकें गी इस घ्याडे मुबारकबाद दित्ती। उनें आक्खेआ जे पौराणिक समें थमां गै बिहार आध्यात्मिका ते शिक्षा दा केन्द्र रेहा ऐ जिनें मुल्खै दी संस्कृति दे संरक्षण च महत्वपूर्ण योगदान दित्ता ऐ। उपराज्यपाल होरें बिहार दे मन्ने परमन्ने दी शख्सियतें गी बी चेता कीता ते भारत दी आजादी दी लड़ाई च उंदी भूमका गी ते आधुनिक भारत दे निर्माण लेई उनेंगी नमन कीता।

<><><><><><>

CS-Dulloo

मुख्य सचिव अटल डुल्लू होरें खुराक, सार्वजनिक बंड बिक्री ते उपभोक्ता मामले सरबंधी मैहकमे दे कम्मकाज बारे तफसीली जायजा लैता। उनें मैहकमे दे कम्में बारे व्यापक जानकारी हासल कीती जिंदे च अन्न-दाने ते होर दुए जरूरी समेयान दी बंड-बिक्री बगैरा शामिल ऐ। डुल्लू होरें आधार कार्ड गी राशन कार्ड कन्नै जोड़ने ते राष्ट्रीय खाद्य सुरक्षा योजना तैहत प्रदेश दे लोकें गी बी आनने बारे जानकारी हासल कीती। मुख्य सचिव होरें प्रशासनिक सुधारें, निरीक्षण ते सिख्लाई सरबंधी मैहकमें दी कम्में बारे व्यापक ब्यौरा हासल कीता। एहदे अलावा मुख्य सचिव होरें मैहकमें दे पिछले ब'रे दी कारकरदगी दा बी व्यापक जायजा लैता जेहदे च प्रशासनिक निरीक्षण, भर्ती नियमें गी मुकदा रूप देना बी शामिल ऐ।

<><><><><><>

CBSE

केन्द्री माध्यमिक शिक्षा बोर्ड सीबीएसई नै नियमें गी नेई मन्ने ते गलत तरीके कन्नै कम्म करने च शामिल 20 स्कूलें दी बोर्ड कन्नै मानता रद्द करी दित्ती ऐ। इनें स्कूलें च जम्मू कश्मीर दे कटुआ जिले दा करतार पब्लिक स्कूल बी शामिल ऐ। सीबीएसई आस्सेआ जारी अधिसूचना च आक्खेआ गेआ ऐ जे इनें स्कूलें खलाफ एह कारवाई उंदे आस्सेआ बोर्ड दे नियमें दी अनदिक्खी करने ते उंदी पालमा करने च जबरदस्त लागर्जी बरतने

दिएं शकैतें दी तस्दीक होने दे बाद कीती गई ऐ। सीबीएसई नै आक्खेआ जे एह स्कूल जिस चाल्ली दिएं अनियमिताएं पर चला करदे हे, उंदे च डम्मी स्टूडेंट यानि स्कूल नेई आए दे किश बच्चें गी स्कूल च हाजर दस्सना, अयोग्य बच्चें गी दाखला देना, रिकार्ड सेही चाल्ली नेई बनाई रखना बगैरा शामिल न। जिनेंगी ध्यानै च रखदे होई स्कूलें दी मानता रद्द कीती गई ऐ ते केइएं दा दर्जा घटाया गोआ ऐ।

<><><><><><>

Safety Audit

पढ़ाई दे अगले सेशन दे शुरू होने कोला पैहले कल मोटर गड्डिएं सरबंधी मैहकमे नै जम्मू दे के.सी.पब्लिक स्कूल च बच्चें दी सुरक्षा जांच कीती गई। एह जांच विजन पैहले अगाह कीते दे चानचक्क छापे दे तौरा पर कीती गई। इस दरान 35 स्कूल बसें दी सुरक्षा जांच कीती गई जिंदे च गड्डी दी स्थिति, रख-रखाव, सुरक्षा सुविधा, सीट बेल्ट, इमरजेंसी च बाहर निकलने दी बवस्था, फर्ट एड किट, ते होर दुइयां जरूरी चीजां ते सुविधा शामिल न। मैहकमा ट्रांसपोर्ट नै सब्बने स्कूलें गी इक बारी परतियै आक्खेआ ऐ जे ओ उंदे बच्चें गी आहन्नने लेई जाने आलिएं गड्डिएं दी सुरक्षा ते रख-रखाव दा पूरा ध्यान रखन ते इत्त भेठा कुसै चाल्ली दी कोई लापरवाही नेई बरती जा।

<><><><><><>

Div.Com

जम्मू दे डिवीजनल कमीशनर रमेश कुमार होरें आक्खेआ जे खेड्डें दा साढ़े जीवन च बड़ा मता महत्व ऐ की जे खेड्डें कन्नै सद्भाव भाईचारे ते किट्ठे रलियै कम्म करने दी भावना, साथ-सैहयोग, समर्थन ते खेड्डें आले जज्बे बी बढ़ावा थ्होंदा ऐ। डिवीजनल कमीशनर होरें गलाया जे खेड्डां नोजवानें गी नुक्सान पजाने आली ते माड़ी कबैतुएं थमां दूर रखदियां न जिंदे च हद्द कोला मता फोन, लैपटॉप, टीवी स्क्रीन पर बने दे रौहना शामिल ऐ। उनें आक्खेआ जे जम्मू कश्मीर दियां पैरा तीरंदाज शीतल देवी होर खेड्डें च अंतराश्ट्रीय पंछान रखदियां न। डिवीजनल कमीशनर होरें एह गल्ल नैशनल एरोबिक जिमनास्टिक चैंपियनशिप 2023-24 दा उदघाटन करने परैत आक्खी। इस प्रतियोगिता दा आयोजन एम.ए.स्टेडियम च होआ जेहदे च डिवीजनल कमीशनर होर मुख् परौहने हे। त्रऊं दिनें दी राश्ट्रीय प्रतियोगिता दा आयोजन जम्मू कश्मीर दे जिमनास्टिक संघ नै जम्मू कश्मीर स्पोर्ट्स काउंसल कन्नै रलियै भारत दे जिमनास्टिक फ़ेडरेशन दे बैनर हेठ करा'रदा ऐ।

<><><><><><>

Martyrdom Day(byte)

अज्ज शहीद—ए—आजम भगत सिंह, राजगुरु ते सुखदेव हुंदा शहीदी ध्याड़ा ऐ। अज्जै दे दिन सन् 1931 च लाहौर षडयंत्र मामले च इनें त्रौनें म्हान शहीदे देसै दी आजादी लेई हस्सदे—हस्सदे फांसी दे फंदे गी गले कन्नै लाई लैता हा। इस मौके पर अज्ज जम्मू कश्मीर सनें समूलचा मुख्ख इनें बहादुर शहीदे गी श्रद्धांजलि देआरदा ऐ। शहीदी ध्याड़े दे मौके पर अखिल भारतीय विद्यार्थी परिषद नै जम्मू विश्वविद्यालय च रक्त—दान शिविर दा आयोजन कीता.....बाईट

<><><><><><>

Arvind Kejriwal

दिल्ली दी राज्ज एवेन्नु अदालत नै कल आबकारी नीति घेटाला मामले च मुख्खमंत्री अरविंद केजरीवाल होरे गी 28 मार्च तोड़ी प्रवर्तन निदेशालय दी हिरासतै च भेजी दित्ता ऐ। विशेष सीबीआई जज कावेरी बावेजा होरे अत्तरुं रातीं केजरीवाल हुंदी गिरफ्तारी दे बाद कल एह हुक्म जारी कीता। ईडी नै केजरीवाल होरे गी घोटाले दे मुख्ख साजशकर्ता दस्सदे होई अदालत कोला 10एं दिनें दी रिमांड दी मंग कीती ही। निदेशालय नै आक्खेआ ऐ जे केजरीवाल आबकारी नीति तैआर करने च सिद्दे तौरा पर शामिल हे।

<><><><><><>

IPL

आईपीएल दे 17में संस्करण दे कल खेड्डे गेदे पैहले मैच च चिन्नेई सुपर किंग्स नै रॉयल चैलेंजर्स बेंगलोर गी 6एं विकेटें कन्नै हराई दित्ता। एह मैच पिछली रातीं चिन्नेई दे एम.ए.चिंदबरम स्टेडियम च होआ। जित्तने लेई 174 रंजे दे लक्ष्य दा पीछा करदे होइ चिन्नेई सुपर किंग्स नै 6 विकेटें ते 8 बाल बकाया रौहने पर जित्त हासल करी लेई। पैहले बल्लेबाजी करने दा फैसला करदे होई रॉयल चैलेंजर्स बेंगलोर नै 20 ओवरें च 173 रंज बनाए। मुस्ताफिजुर रहमान नै चिन्नेई सुपर किंग्स आस्ते 4 विकेटां हासल कीतियां। उनेंगी प्लेयर ऑफ द मैच घोषत कीता गोआ। एहदे शा पैहले एम.ए.चिंदबरम स्टेडियम च रंगारंग उद्घाटन समारोह कन्नै आईपीएल सीजन 17 दी शुरूआत होई।

<><><><><><>